

Y la LLUZ [★]RELLUMA na escuridá

Xn. 1, 4-5



SCOUTS®





MOVIMIENTO SCOUT CATÓLICO

EDITA: Conseyu Xeneral de Scouts MSC.

REDACCIÓN DE CONTENÍOS: Encarnación María Gil (Castores, Llobercos y Venturiegos), Idoia Pozo (Pioneros), Jesús Ferreiro (Andayones) y José Felipe Fernández (Kraal).

TRADUCCIÓN: Daniel Menéndez - Scouts d'Asturies MSC

MAQUETACIÓN Y DISEÑO: Oficina Técnica de Scouts MSC - Comunicación.

ILUSTRACIONES: Roger Torres SJ.

FOTOGRAFÍES: bancu d'imáxenes de Scouts MSC.

© ScoutsMSC 2020



Esti material ta destináu al so usu per parte de Scouts MSC y de toles sos asociaciones miembros. Reconocencia - Déxase crear obres derivaes reconociendo siempre afechiscamente l'autoría y que la so finalidá sía non comercial.

Y la lluz [★]RELLUMA na escuridá

Xn. 1, 4-5

Col lema "Y la lluz relluma na escuridá" (Xn. 1, 4-5) queremos presentar los materiales que, col motivu de la preparación de la llegada de la lluz de la paz, realiza MSC.

Preparar y concienciar sobre esti acontecimientu ye tan importante como lo ye la recepción de la lluz de la paz de Belén y el so repartu.

Y nel fondu, esti ye, pa nós, un símbolu de la recepción nes nueses vides del que ye'l príncipe de la paz, Xesús, y al que vamos dando a conocer con caúna de les nueses acciones diaries de serviciu.

Esti añu los materiales van enxertanos una gran aventura personal y comunitaria. Ye un camín qu'hai que percorrer y que nun ta llibre de peligros y de momentos de dulses. Decidimos salir escontra la lluz, decidimos salir pa escontra Xesús.


Esta aventura ye namái pa valientes. ¿Yes tu d'esos? ¿Tas dispuestu a salir de ti mesmu? ¿Quies alcontrar la lluz? ¿Tienes llercia de la escuridá?

Sabemos que toos tais dispuestos a salir y vencer les escuridaes personales, recordái que'l patronu de los scouts ye San Xurde, el que venció al dragón y lliberó a un pueblu.

Bono, aventureru, llegó'l momentu d'entamar el camín, namái te pedimos que revises lo que llesves na to mochila pa entamar el viaxe: el deséu d'aventures, d'alcontrar muncha xente, de superar retos..., Dexa lo superfluo: el mal royu, el que van dicir por ser creyente, la galbana de facer siempre lo mesmo... Y recuerda qu'hai muchos hermanos que como tu entamaron esta aventura.

Espero que mos atopemos a la fin del camín.

Entames el to viaxe escontra la Lluz.



Material per edaes



LA
LLUZ
DE
LA
PAZ
DE
BELÉN



SCOUTS®




Índice

De 6-8 años	pág. 6
De 9-11 años	pág. 18
De 12-14 años	pág. 32
De 15 a 17 años	pág. 44
De 18 a 23 años	pág. 59
Más de 23 años	pág. 69

6 a 8 años



Afayáivos na aventura



Vamos adentrarnos nun viaxe fabulosu, pero'l nuesu viaxe nun va ser fácil. P'aportar al nuesu destín tenemos de pasar dellos retos. Lo meyor ye que vas poder escoyer qué retu facer cada selmana... ¡O pues facelos toos! Habrá qu'escoyer ente:

- ➡ Realizar una actividá.
- ➡ Completar una reflexón.
- ➡ Facer una oración.

Sabemos que yes una persona digna d'enfotu y que nun dexa les coses a medies, polo que tamos enfotaos en que nun vas pasar al siguiente nivel hasta completar l'anterior.

¡Afáyate nel viaxe encontra la Luz!



Entamamos nel mio castiellu. Ye la mio casa, ellí siéntome protexiu. Los mios collacios y collacies tán comigo nesta aventura. Xuntos subimos a lo alto la torre.

Miramos a tolos llaos, buscando una señal que mos diga per ú dir. Vémosla allantrón. Yá sabemos el camín. Pero enantes de dir escontra ellí, tenemos de resolver dalgún de los retos.

Evanxeliu

Mc 13, 33-37

Naquel tiempu dixo Xesús a los sos discípulos:
—Mirái, vixilái: Nun sabéis cuándo ye'l momentu.
Ye igual qu'un home que marchó de viaxe, y dexó la casa y dio-yos a caún de los sos criados la so xera, encamentándoy al porteru que velara.

Velái entós, porque nun sabéis cuándo va venir el dueñu la casa, si al atapecer, o a la medianueche, o al cantar el gallu, o al riscar: no seya que venga de sutrucu y vos alcuentre apigaciando.

Lo que vos digo a vós, dígo-yoslo a toos: ¡velái!





“Familia vela”

Ello yera una vez una neña que se llamaba Noelia, que cada domingu diba a misa cola güela y los hermanos. Prestába-y mucho dir, sobre too cuando n’Advientu prendíen les veles de la corona qu’allugaben énte l’altar. Siempres imaxinaba que les veles falaben ente elles col xiringase de les llámpares.



Vía la vela morada, más alta que les otres como la Ma Vela. Yera la que protexía los sos ñácaros vela.

El Pá Vela yera la vela de color blancu, la segunda que se prendía, siempres al llau de la ma vela.

La tercera yera la de color Rosa y xunta la de color verde, yeren los Ñácaros Vela.

Xuntos, iguaben una familia que se prendía p’anunciar a Xesús. Noelia imaxinaba que les veles falaben ente elles. ¿Qué crees que diríen? De xuru que falaben de Xesús y de que diba ñacer.

“Montamos el Belén”



Axuntamos a tolos participantes y preguntámos-yos sobro quién taba con Xesús cuando ñació y otros personaxes del Belén, sobremanera, los pastores y pastores. Falamos un pocu sobro ellos y xebramos los personaxes pa que cada participante cree unu de los personaxes colos materiales qu’ haya disponibles: papel, piedres, pintures, cartón.... Ente toos faen un Nacimientu y decórase’l llocal.



Queríu Pá del Cielu,
queremos ser los meyores amigos de Xesús, el to Fíu.
Ser pastorinos y curialu como Tu curies a la nuesa familia.
Pidímostelo con munchu ciñu. Amén.



¡Superemos los retos de la primer selmana! Agora podemos ponemos en camín. El sol dábanos muncha calor mentes andábemos, pero díbemos felices porque buscábemos la lluz que viéremos nel castiellu. Dalgunos de los mios collacios y collacies nun llevaben gorra, asina que punximos les pañoletes pa cubrinlos. Pasín ente pasu fuimos caminando ensin fuelgu. Fiximos una parada y punxímonos a facer los retos.

Evanxeliu

Mc 1, 1-8

Entama l'Evanxeliu de Xesucristo, Fíu de Dios.

Ta escrito nel Profeta Isaías: Yo unvio'l mio mensaxeru delante ti pa que te prepare'l camín.

Una voz glaya nel ermu: Preparái'l camín al Señor, allanái les sos siendes.

Xuan bautizaba nel ermu: predicaba que se convirtieren y se bautizaren, pa que se-yos perdonaren los pecaos. Diba la xente de Xudea y de Xusalén, confesaben los pecaos y él bautizábalos nel Xordán.

Xuan diba vestíu de pelleyu de camellu, con una correa cueru en cadril y comía saltapraos y miel silvestre. Y clamiaba:

—Tres de min vien el que pue más que yo, y yo nun merezo enclicame pa desata-y les sandalies.

Yo bauticévos con agua, pero él va bautizavos con Espíritu Santu.





“La sierpe”

Había una vegada una neña llamada Diana que quería tener una sierpe. So pá y so ma, en cuenta de merca-y una, suxuriéron-y que la fabricara ella mesma. A Diana encantó-y la idea y púnxose a pensar en tolo que precisaba.

Lo primero que buscó foi una gran fueya de papel. Atopóla no fondero del so caxón. Taba un pocu engurriada, pero serviría. So pá ayudóla con unes tires de teles llargues. Asina tendría pa la cola y p’afatala con llacinos. Al so hermanu pidió-y el pegamín. Yá namái faltaben los palos.




Cada tarde, la familia salía a dar un paséu toos xuntos. Pasaren munches selmanas en casa ensin poder salir y desque podíen, nun dexaben pasar la oportunidá de dir al campu que teníen a la vera.

Esi día, Diana diba mirando tou ensin dexar un llugar ensin esquizar. La familia avanzaba a bon ritmu per un camín llargu y un pocu pindiu, pero a Diana dába-y igual, diba buscando los sos palos. Foi atopándolos adules y cuando llegó de nuevu a casa yá tenía tolo necesario pa fabricar la so sierpe.

A los pocos díes yá taba llista. Cuando salieron a pasiar, llevóla y corrió per tol camín faciendo que volara peralta. Encantába-y la so sierpe, yera mucho meyor que una mercada yá que yera única. ¿Mirasti si pues fabricate tu mesmu eso que-y pidiesti a los Reis Magos?

“Llaberintu”



Queríu Pá del Cielu,
 cuando te rezo, siento'l mio corazón feliz.
 Ye como l'amor que siento por mio pá y mio ma
 cuando los abrazo enantes d'acostame. Gracias.
 Amén



La naturaleza ye maraviosa. Díbemos andando pel camín y al pasar un requexu alcontremos una sorpresa prestosa: yera un ríu con un tabayonucu d'agua cristalino y fresco. Decidimos parar un migayín pa llavanos y dar un calumbón. Menos mal que llevábemos los bañadores na mochila. Dexemos la ropa na oriella y metiémonos nel agua. Sólo s'oyía'l pipiar de los páxaros y el xuxuriu del agua correr. Foi una gran recompensa por llegar hasta esi sitiü completando los retos. Pero entá nun llegáremos a la fin, la lluz aguardaba por nós. Yá fresquinos, volviemos facer los retos.

Evanxeliu

Xuan (1,6-8.19-28)

Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.

Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a que-y entrugaren: «¿Tu quién yes?»

Él confesó ensin pensalo: «Yo nun soi'l Mesías.»

Preguntáron-y: «¿Entós, qué? ¿Yes tu Elíes?»

Él dixo: «Nun lo soi.»

«¿Yes tu'l Profeta?»

Retrucó: «Non.»

Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»

Él contestó: «Yo soi la voz que glaya nel ermü: "Allanái el camín del Señor", como dixo'l profeta Isáiés.»

Ente los unviaos había fariseos y preguntáron-y: «Entós, ¿por qué bautices, si tu nun yes el Mesías, nin Elíes, nin el Profeta?»

Xuan respondió-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dignu de desamarrar la correa de la sandalia.»

Esto pasaba en Betania, na otra vera del Xordán, u taba Xuan bautizando.

“Fiesta de mazcaritos”

-Anguaño quiero celebrar el mio cumpleaños con tolos mios collacios y collacies d’escuela... ¡Y voi faer una fiesta de mazcaritos!

Asina de decidíu dixo Daniel a so ma aquella nueche de seronda mentes lu ayudaba a poner el piyama.

-D’alcuerdu -Dixo so ma- Pero tienes que pensar de qué quies mazcaritate y si la fiesta va tener dalgún tema o non.



Dende esi momentu Daniel púnxose a imaxinar tou tipu de fiestas. De primeres pensó en que toos vinieren mazcaritaos de frutes, porque la fruta pestába-y pola vida. Tamién pensó en dinosaurios, pero conocía pocos. A la fin tuvo una gran idea: xuntaría dos coses que-y gustaben y asina la fiesta sedría más risondera. Como Navidá yá taba cerca, la so fiesta sedría pa celebrar que Xesús diba ñacer, pero quixo que los que lo celebraren fueren los que nos cuentos siempre yeren los malos: les bisarmes.

A los sos amigos prestó-yos la idea. El día del so cumpleaños la so fiesta enllenóse de Dráculos vistíos de pastorinos, de Cuasimodos mazcaritaos de camellos, inclusive hubo una momia vistida d’estrella y un Frankenstein cola barba de Gaspar. Foi la fiesta más risondera que naide pudo imaxinar. ¿Qué fiesta te gustaría facer pa celebrar que ñaz Xesús?

“Cobertor pa Jesús”

Pídese a cada participante que lleve esi día un cachu tela, nun fai falta que seya pergrande. Ente toos y toes van cosiendo o xuntando los cachos hasta que tea toa xunida. Va ser un cobertor pa Xesús. Cuando pongan el so cachu, puen escribir con un rotulador un deséu pa la Navidá. N’acabándolu, allugámoslu nel Belén. Si hai munches personas participantes, puen facese dos o más cobertores.



Queríu Xesús,
alcuérdate de los mios
amigos.
Doite gracias por toos ellos.
Son perbonos
y quiérolos mucho.
Protéxilos y cúrialos.
Acompáñalos siempre
de día y de nueche.
Pidímostelo. Amén.



Dempués de folgar un poco volvimos al camín. Atopamos una señal que nos indicaba la dirección a seguir, nun había perda posible. Díbemos allegres, cantando, observando la naturaleza al rodiu nuesu.

Pero'l camín yera llargu y la reciella cansemos un pocu. Menos mal que los nuestos amigos y amigos mayores ayudáronnos y conseguimos seguir el camín ensin problema. Los y les mayores protéxennos siempre, yá seya los nuestos pas, hermanos, hermanes o collacios y collacies...Inclusive a Xesús ayudábalu so ma y siempre taba al pie d'Él.

Cola so ayuda llegamos hasta los nuevos retos. ¡La lluz yá taba mui cerca!



Evanxeliu

Lluques 1, 26-38.



A los seis meses, l'ánxel Grabiél foi unviáu por Dios a una ciudá de Galilea, llamada Nazaré, a una virxe desposada con un home llamáu Xosé, de la stirpe de David; la virxe llamábase María.

L'ánxel, entrando na su presencia, dixo:

—Allégrate, enllena de gracia, el Señor ta contigo; bendita tu ente les muyeres.

Ella tracamundióse con estes pallabres, y entrugábase qué saludu yera aquél.

L'ánxel díxo-y:

—Nun tengas mieu, María, porque alcontrasti gracia énte Dios. Vas concebir nel to vientre y va dar a lluz un fíu y vas pone-y de nome Xesús. Va ser grande, va llamase Fíu del Altísimu, el Señor Dios va da-y el tronu de David, so pá, va reinar sobro la casa de Xacob pa siempre, y el so reinu nun va tener acabación.

Y María dixo al ánxel:

—¿Cómo va ser eso, porque yo nun conozo home?

L'ánxel arrepostió:

-L'Espíritu Santu va venir enriba ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ehí tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben escosa, porque pa Dios nun hai nada imposible.

María retrucó:

—Equí ta la esclava del Señor, fáigase en mi acordies cola to pallabra.



"El paxarín"

Ello yera una vez un neñu que se llamaba Carlos. So ma taba nel cielu y echábala enforma de menos. Siempre que vía a les sos fíes pidía-yos que-y cuntaren cómo yera so ma. Les sos fíes cuntáron-y que so ma yera bien bona, que siempre taba poniendo flores nel altar de la ilesia y que-y gustaba abondo dar catequesis a los neños y a les neñes del barriu.



Un día, Carlos taba xugando na cai colos sos amigos, cuando un paxarucu naciellu cayó dende un árbol cercanu. Él foi corriendo na so ayuda. Buscaron una caja de cartón y ellí punxeron al paxarucu. Miguel, que tenía una frutería violos y averólos della fruta pal paxarucu. Ricardo foi a la so casa a por un pocu d'algodón pa ponelo no fondero la caja.

Carlos llevó'l paxarucu a so casa y curiólu con munchu ciñu. Cuando'l paxarucu curó l'ala que tenía mal pola cayida, volvió llevalu a la cai y ellí soltólu pa qu'esnalara solu. Les sos fíes, que vieron lo muncho que curiara al páxaru, dixéron-y qu'esi paxarucu se paecía a él, qu'unque nun taba cola so ma, gracias al cuidu de los que lu queríen consiguiera ponese fuerte y que podía facer cualquier cosa. ¿A ti quién t'ayuda? ¿Ayudes tu a daquién?




“Corazón de María”

Has d'alcontrar:

- Trés formes de llamar a María.
- Patronu de los Castores.
- Trés personaxes d'“Arat y la so colonia”



Queríu Pá del Cielu,
ayúdame a tener siempre
una sonrisa pa toos
los que m'arrodien.
Ayúdame a vivir
faciendo'l bien,
comoy enseñasti
al to fríu Xesús.
Pidímostelo. Amén.



Y ellí taba. A la fin conseguimos llegar a la Lluz. Esa fuerza que nos emburriaba a seguir el camín yera Xesús, el nuesu gran amigu. Él ye la lluz que víemos dende lo fondero'l nuesu castiellu, que mos acompañó nel ermu, que mos punxo la naturaleza pa que nos llimpiáremos y mos dio señales pa que lu alcontráremos y lu siguiéremos. Agora esa Lluz yá relluma dientro ti, porque la Lluz rellumó na escuridá.

Por cumplir tolos retos ganasti ser portador/a d'esa lluz y tienes una gran misión: llevar esa Lluz a toles persones que nun tienen la suerte de conocer a Xesús y compartila.

9 a 11 años




LA
LLUZ
DE
LA
PAZ
DE
BELÉN



SCOUTS®



Afáyate na aventura



Vamos a adentrarnos nun viaxe fabulosu, pero'l nuesu viaxe nun va ser fácil. Pa llegar al nuesu destín tenemos de pasar una riestra retos. Lo meyor ye que vas poder escoyer qué retu facer cada selmana... ¡O pues facelos toos! Habrás escoyer ente:

- ➡ Realizar una actividá.
- ➡ Completar una reflexón.
- ➡ Facer una oración.

Sabemos que yes una persona digna d'enfotu y que nun dexa les cosas a medies, polo que confiamos en que nun vas pasar al siguiente nivel hasta completar l'anterior.

¡Bienllegáu y bienllegada al viaxe escontra la Luz!



Entamamos nel mio castiellu. Un situu u me siento protexíu, dende u xixilar. Xubo a la torre más alta colos míos collacios y colacies de viaxe, ellí acolumbramos l'horizonte, nun sabemos pa u dir.

Buscamos dalguna señal que mos indique'l camín correctu y de sutrucu vémosla...allalantrón. Ensin tardar, ponémonos en camín, pero enantes d'ello tenemos de resolver dalgún de los retos.

Evanxeliu

Mc 13, 33-37

Naquel tiempu dixo Xesús a los sos discípulos:

—Mirái, xixilái: porque nun sabéis cuándo ye'l momentu.

Ye igual qu'un home que coló de viaxe, y dexó la casa y dio a caún de los sos criaos la xera, encargando al porteru que velara.

Velái entós, porque nun sabéis cuándo va venir el dueñu de la casa, si al atapecer, o a la medianueche, o al cantar el gallu, o al riscar: nun seya que venga ensin esperalo y vos alcuentre apigaciando.

Lo que vos digo a vós, dígo-yoslo a toos: ¡velái!





“La vela”

- Güelu, esplicame de nuevu la hestoria d'esta vela - Cada primer domingu d'advientu, Antonio preguntába-y a so güelu lo mesmo. Prestába-y pola vida sentir la so ronca voz.
- Ta bien. Sienta equí al mio llau y voi cuntate.- Dixo so güelu.
- Cuando yo yera pequeñu, - empezó'l güelu a cuntar- el primer domingu d'advientu aconceyáremos toos en casa. Al volver de misa, sacáremos una caja del armariu y montáremos la corona d'advientu. Yera una corona fecha con caña seco, quitáremos-y el polvu y asitiáremosla nel centru la mesa.



Esi día asitiáremos la primer vela, la de color moráu. Yera una vela alta, gordona. Esa vela recordábanos que tenemos de tar vixilantes, que Xesús s'averaba a nós y tenemos que recibilu como merecía. Cuando col pasu de los años, la vela taba yá pequeñina, prendíemosla y con ella dáremos lluz a la siguiente vela morada, asina aunque nun fuera la mesma, prendiérase cola so lluz. Por eso, cola vela morada prendemos les demás y si remontamos nel tiempu, ye la mesma vela que prendía mio güelu, prendió mio pá, y agora prendemos nós. Recuerda, non dexes que se pierda la vela y ¡sigue vixilante!

“Vixilante y estatuas”

Una persona participante va ser el vixilante del muséu que se va atopar nun llau del espaciu tresnáu pal xuegu. Nel llau contrariu van atopase'l restu, que van ser les estatuas travieses. El/la vixilante va ponese de llombu al restu y nesí momentu les estatuas van avanzar escontra la persona vixilante, pero nel momentu en que se vuelva van detenese y van permanecer inmóviles. Si daquién se mueve o avanza, el/la vixilante va llamalu dende'l so llugar y esta persona pasa a la llinia dende u entamó a avanzar. El/la vixilante vuelve dase la vuelta y van avanzar de nueves hasta que se dea la vuelta y se detengan rápido les estatuas. La primer persona que llogre llegar hasta'l llugar de la persona vixilante va pasar a ocupar el so llugar y va empezar de nuevu'l xuegu.



Padre Dios,
queremos ser los meyores amigos de Xesús, el to Fíu.
Que nos faigas los meyores vixilantes, dignos del so enfotu.
Curia a la nuesa familia porque ellos foron los primeros
vixilantes y guíanos hasta Xesús.
Pidímostelo pol to Fíu, Xesucristu, el Nuesu Señor.

Amén.



En superando los retos, punxímonos en camín. El sol amburaba fuerte dende'l cielu. La calor notábase nel nuesu interior y nun sabíemos si yera pol sol o porque díbemos a la gueta la lluz que viéremos de lloñe. La pañoleta valiúnos de proteición, como siempre, la nuesa fiel collacia d'aventures. El bordón marcaba'l ritmu, como una campana anunciando una bona noticia. El camín yera duru, pero anque hubo momentos de debilidá, saquemos fuerces y encaremos les dificultaes con alegría. Siguíemos la ruta marcada, y enantes de seguir, volvimos enfrentanos a unos retos.



Evanxeliu

Mc 1, 1-8



Entama l'Evanxeliu de Xesucristo, Fíu de Dios.

Ta escrito nel Profeta Isaías: Yo unvió'l mio mensaxeru delante ti pa que te prepare'l camín.

Una voz glaya nel ermu: Preparái el camín al Señor, allanái les sos siendes.

Xuan bautizaba nel ermu: predicaba que se convirtieren y se bautizaren, pa que se-yos perdonaren los pecaos. Diba la xente de Xudea y de Xerusalén, confesaben los pecaos y él bautizábalos nel Xordán.

Xuan diba vestíu de pelleyu de camellu, con una correa cueru en cadril y comía saltapraos y miel silvestre. Y clamiaba:

—Tres de min vien el que pue más que yo, y yo nun merezo enclícame pa desata-y les sandalies.

Yo bauticévos con agua, pero él va bautizavos con Espíritu Santu.



"La sierpe"

Ello yera una vegada un neñu que se llamaba Alex, que tenía un suañu: tener una sierpe.

Nun s'acordaba dende cuando la quería, namái sabía que la quería con toles sos fuerces. Quería baxar a la sablera o dir a la vega y echala a volar, llibre, alta, descarada, con una gran cola de colores.

Pidió-y ayuda a les sos amigues Ikram y Laura. Elles entamaron a facer una llista con tolo que precisaben: un gran cachu de papel, unes vares o palos, filo, pegamín, tela pa la cola. Dividióronse los materiales y caún corrió a casa a buscar tolo necesario. Quedaron en vese esa tarde en ca Alex pa facela.




Elles llegaron con tol material y con música sonando de fondu, entamaron a facer les sierpes...sí, sierpes, porque elles tamién queríen una como'l so amigu. Caún ayudó colo que mejor sey daba y en pocu tiempu les sierpes tuvieron feches. Alex taba entusiasmáu, porque por fin cumpliera'l so suañu. Dio-y les gracies a les sos amigues, yá que ensin elles nun diba ser quien llogralo.

Decidieron poney un nome a caúna d'elles: Alex diba llamala "Cometina", Ikram púnxo-y de nome "Dani" y Laura llamóla "Alauda". Los trés foron a la sablera coles sos cometas nes manes, corriendo tol camín. Cuando llegaron, iguaron bien los filos, apertaron la cola fuerte y a la de trés echaron a correr ente berros mirando cómo'l vientu baillaba coles sierpes. Tuvieron tola tarde ensin parar, hasta que les sos mas, esmolecíes, foron a la sablera a por ellos pa volver pa casa.



"Llabinantu"



¡Hola Xesús! Equí toi colos míos amigos.
Siempre que podemos, buscamos un cachín pa
tar contigo.
Queremos pidite que-y digas a to Pá
que queremos que la xente se quiera muncho,
como nós te queremos a ti
y que mos enseñes a ser lleales y respetuosos.
Pidímostelo pol to Fíu, Xesucristo, el Nuesu Señor.
Amén.



Al pocu tiempu de tar caminando, aportamos a un sitiu magníficu. Yera un ríu con un tabayonucu d'agua cristalino. Decidimos facer una posa nel camín y desaposianos de tola suciedá que teníemos atopada. L'agua llimpiónos y pudimos esfrutar del maraviyosu espectáculu que mos regalaba la naturaleza yá que pasemos del ermu a tar arrodiados d'árboles y con esi gran ríu. En tando llimpios, fomos seguir el nuesu viaxe escontra la lluz, pero enantes, volviemos enfrentanos xuntos y xuntes a dellos retos.

Evanxeliu

Xuan (1,6-8.19-28)

Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.

Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a que-y entrugaren: «¿Tu quién yes?»

Él confesó ensin pensalo: «Yo nun soi'l Mesías.»

Preguntáron-y: «¿Entós, qué? ¿Yes tu Elías?»

Él dixo: «Nun lo soi.»

«¿Yes tu'l Profeta?»

Retrucó: «Non.»

Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»

Él contestó: «Yo soi la voz que glaya nel ermu: "Allanái el camín del Señor", como dixo'l profeta Isaías.»

Ente los unviaos había fariseos y preguntáron-y: «Entós, ¿por qué bautices, si tu nun yes el Mesías, nin Elías, nin el Profeta?»

Xuan respondió-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dignu de desamarrar la correa de la sandalia.»

Esto pasaba en Betania, na otra vera del Xordán, u taba Xuan bautizando.

“Les pieces”

Elo yera una vegada un neñu que se llamaba José al que-y prestaba pola vida facer construcciones con pieces. Tenía munches d’elles y siempres pidía a los Reis Magos que-y traxeren nueves caxes con nueves pieces pa seguir enanchando la so colección.

Nes llargues tardes de seronda, cuando yá acabara los deberes d’escuela, diba pal so cuartu y sacaba delles caxes de pieces. Lo que más-y gustaba yera construir ciudaes. Imaxinaba que yera un gran arquitectu y que podía facer la ciudá como él quixera.



Siempres empezaba faciendo una casa, grande, como la que suañaba tener. Al so alrededor diba creando les cais, con edificios con estructures casi imposibles, con cúpules y arcos perdayures. Pero lo que más-y gustaba yera facer interminables caminos per tolos requexos del espaciu. Con gran paciencia diba asitiando pieza a pieza llendando caminos que surdíen como culiebres per toos llaos.

Gustába-y imaxinar que caminaba per ellos, que se cruciaba con xente que diba caminar y que se facíen amigos y xugaben toos xuntos. Yera’l so momentu favoritu, el xugar toos xuntos pelos caminos. ¿Con quién te prestaba atopate nel camín?



“Faciendo camín”



Recórtense en papeles pa reciclar delles siluetes de manes y pies. Faise un circuitu poniendo en suelu les siluetes, delles vegaes una mano y un pie, un pie solo, dos pies, una mano esquierda y un pie derechu.... Los participantes habrán percorrer tol circuitu ensin fallar. El restu los participantes va tar afalagando a los que lo tan faciendo.



Yá ye cási que Navidá, llueu vas ñacer, Xesús.
 Queremos dar les gracias por esta fiesta tan guapa
 y pidimos pa que tolos neños puedan vivila en paz,
 ensin guerres.
 Nós vamos facer tolo que dependa de nós pa que
 nun haya conflictos.
 Pidímostelo pol to Fíu, Xesucristu, el Nuesu Señor.
 Amén.





En folgando un migayín, continuemos el nuesu camín. Nun tenemos duldes, sabíemos per ú tenemos de dir porque topemos delles señales que mos indicaben el camín. Díbemos allegres, cantando, acolumbrando la rodiada. Sentíemos que la nuesa meta taba cerquina. Los y les mayores, ensin decatase, apuraron el pasu, porque la impaciencia yera muncho. Lo más menudo nun queríen quedar atrás, asina que collaboramos toos y toes, como fai un pá o una ma curiando de los sos fíos y fíes, pa que fuéremos xuntos nel camín y nadie nun quedara atrás. Al cachiquín, alcontremos nuevos retos pa conquistar. La fin taba cerca.

Evanxeliu

Lluques 1, 26-38.



A los seis meses, l'ánxel Gabriel foi unviáu por Dios a una ciudá de Galilea, llamada Nazaré,
a una virxe casada con un home llamáu José, del fonduxe de David;
la virxe llamábase María.

L'ánxel, entrando a la so presencia, dixo:

—Allégrate, enllena de gracia, el Señor ta contigo; bendita tu ente les muyeres.

Ella alterióse énte estes palabres, y preguntábase qué saludu yera aquél.

L'ánxel díxo-y:

—Nun tengas mieu, María, porque atopasti gracia énte Dios. Vas concebir nel to vientre y vas dar a lluz un fíu y vas poney de nome Xesús. Va ser grande, va llamase Fíu del Altísimu, el Señor Dios daráy el tronu de David, so padre, va reinar sobro la casa de Xacob pa siempres, y el so reinu nun va tener acabación.

Y María dixo al ánxel:

—¿Cómo va ser eso, pos nun conozo varón?

L'ánxel contestó-y:

—L'Espíritu Santu va venir sobro ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ende tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben estéril, porque pa Dios nun hai nada imposible.

María repostió:

—Equí ta la esclava del Señor, fáigase en mi acordies cola to pallabra.




“El baille”

Ello yera una vegada una neña que se llamaba Alicia. Yera la hermana mediana, perriba y perbaxo tenía un hermanu. Olivaba polos sos hermanos. Lo que más-y prestaba yera baillar. Podía pasar el día colos auriculares puestos escuchando música y ximelgando la cadarma. Un día, vio un cartelu nel que s'anunciaba un concursu de baille. Entusiasmóse porque yá se vía nel escenariu, enseñando a los demás lo que yera quien pa facer. Pero desilusionóse un migayín porque lleó nel cartelu que'l concursu yera pa grupos, non pa persones soles.



Decidió facer el baille colos sos hermanos, asina qu'esi día, mentes taben toos sentaos a la mesa pa xintar, díxo-yos que quería cuntar con ellos pa facer un baille. Al so hermanu mayor, de primeres nun-y prestó muncho la idea, porque-y daba daqué vergoña, pero decidió ayudalu. Al so hermanu pequenu prestába-y tamién enforma baillar, asina qu'apuntóse ensin duldalo. Caldía, acabante comer poníense a ensayar. Alicia dirixía, dándo-yos consejos y corrixendo pequeños fallos. Al pocu, yá teníen la so coreografía llista, pero siguién ensayando xuntos. El concursu pasó, pero ellos siguieron baillando xuntos en casa, porque se dieron cuenta que xuntos pasábenlo perbien y qu'Alicia-yos enseñaba muncho.



Y ellí taba. A la fin conseguimos llegar a la Lluz. Esa fuerza que nos emburriaba a seguir el camín yera Xesús, el nuesu gran amigu. Él ye la lluz que víamos dende lo más fondo del nuesu castiellu, acompañónos nel ermu, púnxonos la naturaleza pa que mos llimpiáremos y diomos señales pa que lu atopáremos y lu siguiéremos. Agora esa Lluz yá lluz dientro ti, porque la Lluz rellumó na escuridá.

Por cumplir tolos retos ganasti ser portador/a d'esa lluz y tienes una misión pergrande: llevar esa Lluz a toles persones que nun tienen la suerte de conocer a Xesús y compartila.

12 a 14 años




LA
LLUZ
DE
LA
PAZ
DE
BELÉN



SCOUTS®



Afáyate na aventura



Vamos a adentrarnos nun viaxe fabulosu, pero'l nuesu viaxe nun va ser fácil. Pa llegar al nuesu destín tenemos de pasar una riestra retos. Lo meyor ye que vas poder escoyer qué retu facer cada selmana...¡O pues facelos toos! Habrás escoyer ente:

- ➔ Realizar una actividá.
- ➔ Completar una reflexón.
- ➔ Facer una oración.

Sabemos que yes una persona digna d'enfotu y que nun dexa les cosas a medies, polo que confiamos en que nun vas pasar al siguiente nivel hasta completar l'anterior.

¡Bienllegáu y bienllegada al viaxe escontra la Luz!



Entamamos nel mio castiellu. Ye'l mio abellugu, ellí pueo ser yo, ensin escondeme. Los mios amigos vienen ayudame. Xuntos, de xuru que lo vamos llograr. Xubimos a la torre del castiellu. Buscamos perdayures la señal que mos indique qué buscamos y ú ta.

Ye como'l xuegu de protexer banderes, agora buscamos daqué más interesante. Buscamos la lluz. Yá sabemos ú dir, pero enantes, vamos resolver los retos.

Evanxeliu

Mc 13, 33-37

Naquel tiempu dixo Xesús a los sos discípulos:

—Mirái, xixilái: pos nun sabéis cuándo ye'l momentu.

Ye igual qu'un home que coló de viaxe, y dexó la so casa y dio a caún de los sos crios la xera, encargando al porteru que velara.

Velái entós, pos nun sabéis cuándo va venir el dueñu de la casa, si al atapecer, o a medianueche, o al cantar el gallu, o al riscar: nun seya que venga de sutrucu y vos atope apigaciando.

Lo que vos digo a vós, digo-yoslo a toos: ¡velái!



"El faru"

Ello yera una vegada una muyer y la so fía que teníen un suaño: queríen construyir un faru. Pero non nun puertu, al llau de la mar. Non, elles queríen llevantalú nun pueblu perdíu de la cordolera, a milenta quilómetros de distancia cola mar.

La xente averábase al veles trabayar. Dicíen-yos que nun tenía xacú lo que taben faciendo y ríense d'elles. Pero elles siguíen trabayando ensin fuelgu, día tres día.

Una tarde, por fin, yá lu terminaron. La xente, bien interesao, atopóse al rodiu'l faru pa siguir riéndose d'elles. Sigúen ensin entender el porqué d'esi faru. Elles, con una gran sorrisa comprobaron que tou funcionaba bien y metiéronse dientro d'él a vivir.



El tiempu pasó y una tarde d'iviernu'l cielu escurecióse de secute. Les ñubes volviéronse prietes y entamó la truená. Nin los más vieyos del llugar sintieren una truená asemeyada. Los rellampios allumaben fugaces el cielu y los truenos asolapábense unos con otros. De secute, marchó la lluz de tol pueblu. Un rayu algamara la torre de lletridá. El pueblu enteru taba a escures, cuando de secute entamó a vese una lluz. Yera'l faru allumando col so fexe de lluz tola rodiada. La ma volvióse pa la fía y díxo-y: ¡Ves, nun se va perder, el neñu Xesús va ver la lluz y va venir ñacer nel nuesu preselbe como tolos años!

La xente entendió que la lluz nun yera namái pa los barcos, toos precisaben lluz, anque fuera una lluz interior, pa siguir coles sos vides.

"A mano"



Fainos falta cuerda, palos, navaya o tisories. Cada participante tien de crear a Xesús nel preselbe y a Xesús na Cruz faciéndolos con palos y cuerdes, emplegando la mayor cantidá de noyos posibles.



Señor, dame la to lluz porque toi ciegü.
Señor, dame'l vientu pa qu'arrample con tolo malo.
Señor, dame la lluvia pa purificar la mio alma.
Amén.



Colos retos finaos punxímonos en camín. El sol rellumaba fuerte y andábase con munchu afoguín. De sutrucu, decatémonos que díbemos en silenciu. Queríemos guardar fuerces y entamemos a esfrutar del camín. Caún diba reflexonando sobro'l so camín na vida, sobro la lluz que mos aguardaba a la fin y apaecien perbones acordances. Les sorrisos allumaben les nueses cares. Fiximos una posa y decidiemos volver a facer los retos ente toos y toes.

Evanxeliu

Mc 1, 1-8

Entama l'Evanxeliu de Xesucristu, Fíu de Dios.

Ta escrito nel Profeta Isaíes: Yo unvio'l mio mensaxeru delante ti pa que te tresne'l camín.

Una voz glaya nel ermu: Preparái el camín al Señor, allanái les sos siendes.

Xuan bautizaba nel ermu: pedricaba que se convirtieren y se bautizaren, pa que se-yos perdonaren los peccaos. Allegábase la xente de Xudea y de Xerusalén, confesaben los sos peccaos y él bautizábalos nel Xordán.

Xuan diba vistíu con pelleyu de camellu, con una correa de cueru en cadril y alimentábase con saltapraos y miel montés. Y clamiaba:

—Tres de mi vien el que pue más que yo, y yo nun amerito agachame pa desamarra-y les sandalies.

Yo bauticévos con agua, pero él va bautizavos con Espíritu Santu.





"L'ermu"

Ello yera una vegada un mozu pastor que vivía nel ermu. La so vida taba dedicada a dir pel ermu colos sos camellos llevando mercancíes d'un llau a otru del ermu. Avezaba atopar caravanes de mercaderes que volvíen de vender nos pueblos. Una nueche, unos mercaderes averáronse hasta u taba acampáu y preguntáron-y si podíen quedar con él. Él dixo que sí encantáu y compartió lo poco que tenía con ellos. N'agradecimientu, al otru día, los mercaderes diéron-y un arca balera y una cuerda. Él sintióse estrañáu por tan raros regalos, pero guardólos colos sos xarales y prosiguió'l so camín.



Al cachu, atopó una pareya, diben con un pollín pel camín. Ellos dixéron-y que diben de camín a ver a unos familiares, pero que'l pollín fuxía en cuantes que podía porque rompiera la cuerda que lu arreyaba y nun podíen nin soltalu. El pastor, ensin pensalo, regaló-yos la cuerda. Ellos estimáronlo enforma y dixéron-y que mirara l'arca. ¡Agora taba enllena monedes! Ayudástinus ensin pensalo al igual qu'ayudasti a los mercaderes. Anque creas que lo que los otros te dan ye daqué balero, calténlo, porque nunca nun sabes cuándo va facer falta esa enseñanza o esi regalú tan raru que te fixeren. ¿Cuál ye'l regalú más raru que te fixeron? ¿Cuál crees que ye'l regalú más raru que-y fixeron a Xesús al ñacer?

"Canción pa Xesús"



Componer o buscar un cantar qu'espeye lo que pa ellos y elles ye la nacencia de Xesús. Habrán componela o buscala, ensayala y crear un baille pa facelu a los otros del grupu.



Señor, ayúdanos a camudar pa camudar el mundu como Tu lo mires.
Ayúdanos a sentir como Tu sientes con esi duelgu infinitu.
Ayúdanos a tener el corazón preparáu pa la venida del to Fíu.
Amén



La calor que nos diba trescalando en cuerpu dábanos la sensación de tar puercos y puerques. Precisábemos llimpianos. Al pocu tiempu de tar caminando, lleguemos hasta un ríu con un tabayonucu d'agua cristalino y fresquino. Namái s'oyía'l cantar de los páxaros y el ruxerruxe de l'agua que corría. La caminada, la reflexón interior que caún fixera dexáranos baldaos. Decidimos llimpianos un pocu pa poder seguir caminando, quitar lo puerco que nos envolubaba. Metiémonos nel agua y al cachu, volviemos rir y a compartir colos otros. Foi como un reñacer. Nun escaeciémos que la lluz taba aguardándonos, teniemos de dir na so gueta. Mentos poníemos ropa llimpio fiximos los retos.

Evanxeliu

Xuan (1,6-8.19-28)

Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.

Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a quey entrugaren: «¿Tu quién yes?»

Él confesó ensin pensalo: «Yo nun soi'l Mesías.»

Preguntáron-y: «¿Entós, qué? ¿Yes tu Elías?»

Él dixo: «Nun lo soi.»

«¿Yes tu'l Profeta?»

Retrucó: «Non.»

Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»

Él contestó: «Yo soi la voz que glaya nel ermu: "Allanái el camín del Señor", como dixo'l profeta Isaías.»

Ente los unviaos había fariseos y preguntáron-y: «Entós, ¿por qué bautices, si tu nun yes el Mesías, nin Elías, nin el Profeta?»

Xuan respondi-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dighu de desamarrar la correa de la sandalia.»

Esto pasaba en Betania, na otra vera del Xordán, u taba Xuan bautizando.



Dacuando perdíamos l'aldu y nun sabíemos per u dir, pero atopemos una señal que mos indicaba la dirección pa seguir. La naturaleza arrodíábanos dafechu y yá nun sabíemos ú mirar porque too yera formosu. El camín yera llargu y la reciella foi cansando. Dalgunos de nós garrémoslos a xocostrines y seguimos caminando. Los neños preguntáronnos si pesaben muncho y dixímos-yos que yeren los nuesos hermanos y les nueses hermanes, qu'un hermanu/a nun pesa nunca. Asina qu'allegres y canturriando fiximos una posa en camín...yá víemos la lluz allalantrón, cada vez más cerquina... pa facer dellos retos.



Evanxeliu

Lluques 1, 26-38.



A los seis meses, l'ánxel Gabriel foi unviáu por Dios a una ciudá de Galilea, llamada Nazaré, a una virxe casada con un home llamáu José, del fonduxe de David; la virxe llamábase María.

L'ánxel, entrando a la so presencia, dixo:

—Allégrate, enllena de gracia, el Señor ta contigo; bendita tu ente les muyeres.

Ella alterióse énte estes palabres, y preguntábase qué saludu yera aquél.

L'ánxel díxo-y:

—Nun tengas mieu, María, porque atopasti gracia énte Dios. Vas concebir nel to vientre y vas dar a lluz un fíu y vas pone-y de nome Xesús. Va ser grande, va llamase Fíu del Altísimu, el Señor Dios dará-y el tronu de David, so padre, va reinar sobro la casa de Xacob pa siempres, y el so reinu nun va tener acabación.

Y María dixo al ánxel:

—¿Cómo va ser eso, pos nun conozo varón?

L'ánxel contestó-y:

-L'Espíritu Santu va venir sobro ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ende tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben estéril, porque pa Dios nun hai nada imposible.

María repostió:

—Equí ta la esclava del Señor, fáigase en mi acordies cola to pallabra.



“Los instrumentos”


Ello yera una vegada dos instrumentos que nun se llevaben nada bien. La flauta de trés furacos y el tamboril siempres taben aldericando sobro quién sonaba meyor. La flauta argumentaba qu'el so son podía oyese dende bien lloñe, que los soldaos lu emplegaban pa facese señales y asina vencer. El tamboril contestába-y qu'él sonaba mucho meyor, qu'el so son roncu yera mucho más potente y que sirvía pa marcar el ritmu cuando marchaben los soldaos.

Nun se poníen d'aluerdu, siempres taben aldericando, tanto, que los soldaos dexáronlos abandonaos metanes d'un prau.

Al pocu tiempu aportó un mozu pastor. Yera bien allegre, vistía con camisa blanca y pantalones vaqueros. El polvu de los caminos facía-y engurriar la mirada y daba una tonalidad arenosa al so pelleyu. Cubríase la boca con un pañuelu pa protexese del polvu. Diba caminando cuando s'atopó colos instrumentos. Primero garró la flauta, quitó-y el polvu que la anubría y prebó el so son. La flauta sonó arguyosa, pensando que la diba llevar a ella sola. El pastor dexó la flauta y garró'l tamboril. Con un palu qu'atopó foi dando toques nel pelleyu esfoláu del tamboril y el son retumbó per tol llugar. El tamboril tamién pensó que lu diba llevar polo bien que sonaba.

Pero'l pastor tuvo una idea. Garró los dos instrumentos y entamó a tocalos al empar. De primeres nun sonó nada bien, pero como tenía tiempu porque-y quedaba un bon cachu de camín, siguió ensayando colos dos instrumentos. Al pocu, los dos instrumentos entendieron que xuntos sonaben mucho meyor, que xuntos podíen sacar lo meyor del otru. A estes, el pastor nun usó la xuntanza de los instrumentos pa tocar música de guerra, sinón que foi a una capiellina y tocó pa la Virxe.





Y ellí taba. A la fin consiguiemos aportar a la Lluz. Esa fuerza que mos emburriaba a seguir el camín yera Xesús, el nuesu gran amigu. Él ye la lluz que víemos dende lo más fondo del nuesu castiellu, acompañónos nel ermu, púnxomos la naturaleza pa que mos llimpiáremos y diomos señales pa que lu atopáremos y lu siguiéremos.

Agora esa Lluz yá lluz dientro ti, porque la Lluz rellumó na escuridá.

Por cumplir tolos retos ganasti ser portador/a d'esa lluz y tienes una misión pergrande: llevar esa Lluz a toles persones que nun tienen la suerte de conocer a Xesús y compartila.

15 a 17 años



Afayáivos nuna nueva aventura, Pioneros y Pioneres.

Metanes la vuesa travesía, vamos percorrer un camín bien especial los próximos cuatro domingos.

Esti tramu nun ye una esviadura, nin un simple atayu. Llámase Advientu, y ye fundamental que lo vivamos con intensidá, pos solo asina vamos poder preparar el nuesu corazón pa reconocer la Lluz que nos aguarda a la fin.

Ye la Lluz que lo fundamenta too y la que da respuesta a les entrugues más fondes que tantes vegaes facemos. Asina que, paga la pena, ¿nun ye asina?

Sicasí, tal que-yos asocede a los y les valientes navegantes que se llancen a ser pioneros/es derrompiendo nuevos mares, paez ser que nós tamién vamos atopar misterios que tendremos de resolver adúlces.

P'aportar al nuesu destín, van proponéenos una riestra retos cada selmana. Pero nun vos amurniéis, ¡precisamente ye eso lo que fai qu'un camín esprenda'l sabor que tien percorrelu!

Los mapes que consultemos pa entamar el nuesu viaxe llévennos a albidrar que tendremos de ser capaces de:

- ➔ Realizar una actividá.
- ➔ Completar una reflexón.
- ➔ Facer una oración.

Sabemos que sois persones dignes d'enfotu y que nun dexáis les coses a medies, polo que tenemos la seguranza de que nun vais pasar a la siguiente selmana ensin percorrer l'anterior.

¡Bon viaxe escontra la Lluz!



Como dicíemos enantes, vós, Pioneros/es yá tais en marcha. Va trés años, tal que facíen los valientes caballeros de la Edá Media, decidíestis salir “del vuesu castiellu” pa entamar un viaxe bien importante, nel que vais poder conocer abondo sobro quién sois y quién queréis aportar a ser.

Nesta travesía, distintes señales van empobinándovos pa saber qué aldu siguir.

Concretamente, nestes dates, avérase una esviadura llarada de marques: lletreros, lluces prendíes... ¿qué opción escoyer?, ¿cuála ye la dirección escontra la Lluz? De xuru que solo un camín ye l'auténticu, asina que tái sollertes y vixilantes. Pa ello, tratái de facer frente a los retos que se vos proponen.

¡Ánimu!

Evanxeliu

Mc 13, 33-37



Naquel tiempu dixo Xesús a los sos discípulos:
—Mirái, xixilái: porque nun sabéis cuándo ye'l momentu.
Ye igual qu'un hombre que coló de viaxe, y dexó la casa y dio-yos a caún de los criaos la xera, encamentando al porteru que velara.

Velái entós, porque nun sabéis cuándo va venir el dueñu de la casa, si al atapecer, o pela medianueche, o al cantar el gallu, o al riscar: nun seya qu'apaeza de sutrucu y vos alcuentre apigaciando.

Lo que vos digo a vós, dígo-yoslo a toos: ¡velái!





“Mapa mental”

- **Oxetivu:** qu’el mozu/la moza abra los sos sentíos a Dios y se dea cuenta de la necesidá que tien d’Él, pa que pueda llegar a entrugase:

¿Qué ye lo que quier Dios de mi y pa mi?

Trátase de ver cómo ye la rellación de cada mozu/a con Xesús, si lo siente como un amigu na so vida o una persona alloñada.

- **Preseos:** 1 fueya y rotuladores pa cada participante.
- **Desendolque:**

En función del número de pioneros y pioneres de cada rama, van faese grupinos.

A la mayor parte de pioneros/es va apurríse-yos una fueya en blancu (modelu) y unos rotuladores y va esplicáse-yos qu’individualmente van realizar un mapa mental cola siguiente entruiga:

¿Qué quier Dios de mi y pa mi?

El/la participante va dir respondiendo y, a manera de lluvia d’idees, va dir completando’l so mapa.

Al finar, van xuntase en grupinos pa compartir caún el so mapa mental y finalmente, van realizar un colax conxuntu con tolos mapes mentales.

Per otra parte, al restu de la unidá van apurríse-yos periódicos y revistas d’actualidá pa qu’elaboren un colax qu’espeye actitúes, comportamientos, acciones de los y les moces de güei: consumismu, folixa, egoísmu...

- **Conclusión:**

Cuando tolos grupinos terminaren, va xuntase tola rama y cada grupín va dir presentando al restu de grupos el so colax de mapa mental y el so colax del mozu/de la moza de güei.

La presentación va llevar a cada mozu a valorar que, atopase con Dios, va más p’allá de lo que la sociedá mos marca pa esta dómina del añu. Nun faen falta muchos regalos, nin lluces, nin grandes folixes... Dios ta nes pequeñes coses de les nueses vides, esperándonos siempre, ensin mieos, ensin esmoliciones...



Dios ye asina d'inesperáu y, dacuando, d'inoportunu.

¡Cuánto mos prestaría controlar dafechu cuándo, cómo, ú s'ha manifestar Dios! Pero Dios ye incontrolable.

Nun sabemos el día nin la hora na que se va a faer l'alcontradizu con nós.

Pero daqué sí tenemos claro: quier atopase con nós.

Ye'l so "sí", el so apueste radical por caún de nós.

Y eso tendría de facenos camudar la cara y dexanos de tar enfocicaos. ¿Cuándo me cafia Dios?

¿Siento qu'Él, n'otres ocasiones, ye aliendu pal mio camín?

¿Cuándo lo busco yo?



Repiti interiormente la oración qu'apaez darréu:



Señor, yo búscote. Pero resulta que Tu yá vinieres escontra mi.

 **Canción:** Álvaro Fraile - "Te busco"

https://www.youtube.com/watch?v=xHWB-PNOTvA&feature=emb_logo



Pa entamar, decidiestis seguir una d'aquelles señales y agora atopáisvos travesando un camín que s'alcuentra metanes d'una zona con munchu ermu. La cebera ta escosa y les condiciones del viaxe fixéronse bien dures. De primeres, sentistis que la Rama tenía de tar más xunida que nunca, compartiéndolo too, sofítándoos abondo...

Pero, de secute, naquel ermu descomanáu, viestis una nueva marca de lloñe. Yera raro, pero cada miembru de la Rama detectabais una señal distinta, y nun puntu distintu. Asina, caún empezastis a proponer un aldu y, a la fin, caún decidiestis seguir una marca pasando de los demás.

En tando solos/es, daqué movióse nel vuesu interior, daqué que vos fixo recapacitar y que vos llevó a mirar al cielu y a analizar meyor l'aldu que siguíeis. De secute, les distintes señales poles que cada Pioneru/a vos empobinábeis, terminaron xuniéndose, dando llugar a una gran lluz, a una única marca que rellumaba permuncho, muncho más que cualesquier otra. Siguiésti-la y... ¿sabéis? volviestis axuntavos toos y toes nesti camín del ermu. Agora sí: tais preparaos/es y xuníos/es pa encarar los siguientes retos.

Evanxeliu

Mc 1, 1-8



Entama l'Evanxeliu de Xesucristu, Fíu de Dios.

Ta escrito nel Profeta Isaías: Yo unvió'l mio mensaxeru delante ti pa que te tresne'l camín.

Una voz glaya nel ermu: Preparái el camín al Señor, allanái les sos siendes.

Xuan bautizaba nel ermu: pedricaba que se convirtieren y se bautizaren, pa que se-yos perdonaren los pecaos. Allegábase la xente de Xudea y de Xerusalén, confesaben los sos pecaos y él bautizábalos nel Xordán.

Xuan diba vistíu con pelleyu de camellu, con una correa de cueru en cadril y alimentábase con saltapraos y miel montés. Y clamiaba:

—Tres de mi vien el que pue más que yo, y yo nun amerito agachame pa desamarray les sandalies.

Yo bauticévos con agua, pero él va bautizavos con Espíritu Santu.





Ítaca

Cuando entames el to viaxe a Ítaca
 pidi que'l camín sía llargu, enllenu d'aventures,
 enllenu d'esperiencias.
 Non tengas llercia polos lestrigones nin los cíclopes
 nin pol griespu Poseidón,
 seres talos qu'examás vas topar nel to camín,
 si'l to pensar ye eleváu, si selecta ye la emoción
 que toca'l to espíritu y el to cuerpu.
 Nin a los lestrigones nin a los cíclopes
 nin al xabaz Poseidón vas atopar, si nun
 los lledes dientro de la to alma, si nun
 los irgue la to alma delante ti.
 Pidi que'l camín sía llargu.
 Que munches sían les mañanes de branu nes
 que llegues -¡con qué prestar y alegría!
 a puertos que nunca enantes vieres.
 Para nos emporios de Fenicia y
 faite con formoses mercancíes, nácare y
 coral, ámbare y ébanu
 y toa mena d'arumes sensuales, cuantos
 más abondosos arumes sensuales puedas.
 Vei a munches ciudaes exipcies
 a deprender, a deprender de los sos sabios.
 Ten siempre a Ítaca na to mente.
 Aportar ellí ye'l to destín.
 Pero nun entáines nunca'l viaxe.
 Meyor que dure muchos años
 y atracar, vieyu yá, na islla,
 arriquecú de tolo que ganasti nel camín
 ensin aguantar a que Ítaca t'arriqueza.
 Ítaca convidóte a esti formosu viaxe.
 Ensin ella nun entamaríes el camín.
 Pero nun tien yá nada que date.
 Anque la topes probe, Ítaca nun t'engañó.
 Asina, sabiu como volviesti, con tanta esperiencia,
 vas entender yá qué signifiquen les Ítaques.



Canción: Diego Torres ft. Juan Luis Guerra - Abriendo Caminos
<https://www.youtube.com/watch?v=HTUaXUaXaX4>



Descubrir el camín a seguir xunta Dios

- **Oxetivu:** vivir l'advientu como un camín importante escontra la llegada de Xesús. Afayar la presencia de Dios no cotidiano del día.
- **Preseos:** una estrella de papel, en tamaño grande, pa cada participante y rotuladores.
- **Desendolque:**

Hai díes nos que no podemos sentir solos/es, cansaos/es... ensin atopar sentíu al momentu que vivimos. Ye entós cuando ye necesariu levantae, vistise y afayar, como lo facíen los vieyos marinos, la estrella del aldu. Los navegantes retomaben el sentíu del camín al traviés de lo constante nes sos vides, les estrelles.

Asina, nós nun podemos prescindir de la constante del amor de Dios, que nun dexa de danos signos sensibles del so ciñu. Él enllena de sentíu nuevu lo que dacuando nos resulta rutinariu o vacíu.



- **Motivación:** el/la responsable va empezar rellatando la forma na que los marinos d'antiguo se guiaben per aciu de les estrelles. Elles yeren la meyor brúxula metanes la nueche solitaria del océanu. Pero yera necesariu que supieren identificar de mou afayadizu cada constelación. Entós, los sos pequeños o grandes barcos non solo se poníen en contactu col agua, tamién navegaben pel cielu.
- **Actividá:** cada participante va recibir una estrella de papel na que va tener de completar los siguientes ítems:
 - Numberar les actividaes de la selmana.
 - Describir cuáles fueron les más significatives y por qué.
 - Tener en cuenta a les persones coles que compartieron eses actividaes, les sos actitúes, testimonios, qué resclavu dexaron nellos.
- **Conclusión:** cada pioneru/a va compartir una de les actividaes significatives de la selmana. El restu va ayudalu a ver signos de Dios nelles. Terminada la puesta de mancomún, cada pioneru/a va escribir nel aviesu de la so estrella aquella señal más clara de la presencia de Dios nel so camín diariu. El/la responsable suxurirá-yos qu'esa estrella la asitien en dalgún llugar avezáu mentes les actividaes diaries: l'axenda, una carpeta, dalgún llugar de la casa, etc.



Gracies Señor, por enseñamos los tos caminos,
 los caminos de lo cenciello,
 los tos caminos verdaderos,
 los tos caminos escontra'l Reinu,
 los tos caminos más queríos,
 que se percuernen en compañía.
 Pidímoste que mos ayudes a seguir descubriéndote,
 Que mos ayudes a saber escoyer los rumbos que mos lleven al to camín:
 Un camín d'allegría, de felicitá y xunta ti,
 porque te necesitamos.
 Enséñamos, Señor, los tos caminos,
 los caminos de lo cenciello.

Siguistis y agora lleváis unos díes caminando pela oriella d'un gran ríu. Equí, aprovechastis pa llavar lo puerco acumulao na vuesa ropa a lo llargo la travesía.

Fai non munches llunes, mentes tentabeis de dormir, escuchastis un ruiu que vos esconsonó. Llevantástisvos y, de secute, empobinástivos escontra l'orixe d'aquel soníu, que cada vez se facía más fuerte. ¿Sabéis aú llegastis? Nin más nin menos qu'a un campamentu.

El soníu venía de una gran llacuada qu'ellí s'entamó, y a la que se vos convidó a quedavos. Too ellí yera luxu, había riqueza perdayures, la xente tiraba la comida a la basoria porque-yos sobraba, los convidaos despreciaben a los que sirvíen, unos aldericaben a berros mentes otros na mesma mesa faciense los sordos y solo poníen atención al ruiu...

Murnios por ver aquello, mirastis esperanzas y sollertes al cielu y de nueves pudiestis ver la gran lluz que tanto rellumara la otra vegada. Pellí habría de seguir el vuesu camín.

Eso sí, antes de colar, llevantástisvos ya tentastis de facer silenciu naquella llacuada. De primeres, queríeis convidar al restu a contemplar el cielu, pa que dempués vos acompañaren hasta'l gran ríu, col envís "de llavar lo puerco"... Sicasí, nun vos fixeron casu y siguieron a lo d'ellos. Asina que garrastis de nueves les vuses mochiles de travesía y siguiestis el viaxe escontra esa gran lluz.

Y neso tais agora, siguiendo aquella señal tan brillante. Anque enantes de seguir, nun escaezáis que tenéis de resolver nuevos retos.

Evanxeliu

Xuan (1,6-8.19-28)

Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.

Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a que-y entrugaren: «¿Tu quién yes?»

Él confesó ensin pensalo: «Yo nun soi'l Mesíes.»

Preguntáron-y: «¿Entós, qué? ¿Yes tu Elíes?»

Él dixo: «Nun lo soi.»

«¿Yes tu'l Profeta?»

Retrucó: «Non.»

Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»

Él contestó: «Yo soi la voz que glaya nel ermu: "Allanái el camín del Señor", como dixo'l profeta Isaías.»

Ente los unviaos había fariseos y preguntáron-y: «Entós, ¿por qué bautices, si tu nun yes el Mesíes, nin Elíes, nin el Profeta?»

Xuan respondió-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dignu de desamarrar la correa de la sandalia.»

Esto pasaba en Betania, na otra vera del Xordán, u taba Xuan bautizando.

Xuan el Bautista, el guía que nesta travesía mos empobina al alcuentru con Dios.

Ye "la voz mesma del Señor metanes del ermu". L'ermu que travesabeis nesti viaxe conviértese, asina, nel llugar de Dios. El llugar afayadizu pa saborguiar y afondar na so Pallabra. Pa enanchar la nuesa Fe en Cristu.

Nel evanxeliu, vemos que los sacerdotes y levites tamién s'averaben a Xuan Bautista coles entruques que podíamos tener nós, los Pioneros: "¿Quién yes tu?", y énte la so contestación aporfíaben: "¿Quién yes pa que deamos una respuesta?, ¿qué dices de tí?" a lo que Xuan retrucaba: "Yo soi la voz del que clama nel ermu: endrechái'l camín del Señor".

Xesús camina escontra esti home. Xuan ye la voz y Xesús ye la Pallabra que va enllenar de lluz el mundu enteru. Los qu'escuchen la voz van tar más próximos a conocer la pallabra que salva, la pallabra definitiva del Padre, el Verbu de vida, que ye'l Fíu. Xesús camina al pie d'otros cola seguridad del que sabe que va camudar el mundu aquellos díes. Entemezse ente los pelegrinos, ente los homes de bona voluntá, y va en silenciu, discretu... tal que quier entrar nel nuesu corazón.



- A Xuan entrúguen-y si yera él el Mesías, l'unviáu...
¿Y tu? ¿Qué podríes dicir de Xesús dende la to vida?

- Neto que Xuan, tenemos como misión anunciar y preparar la venida del Señor.
Y tu, ¿qué coses concretes te propones pa que seya asina?

- Examina la to vida d'oración, cómo la llesves, cuándo reces, cómo ye la to rellación col Señor...
*¿Tas preparáu/a pa dexate guiar por Él?
¿Atrévete a ayudar y a animar a los tos collacios/es, amigos/es, persones coles que tas en contactu pa que conozan meyor al Señor y tengan mayor xorrecimientu na so fe?*

- L'Advientu ye ermu, austeridá, conversión...
¿Vas poder arrenunciar a comodidaes, coses y gastos superfluos en beneficiu de les persones que nun tienen y como preparación a la venida de Xesús?

- Na nuesa vida hai zones escuras que precisen de la lluz.
Piensa na to vida, alcuentra eses escuridaes y comparti dalguna d'elles colos tos collacios y collacies de Rama.

- Sé testigu d'enfotu y d'allegría metanes de les persones y problemes que t'arrodien.
¿Anímeste?



Señor Xesús,
 el to unviáu, Xuan el Bautista,
 nun tuvo reparu en dicir una y otra vegada,
 qu'él nun yera'l Cristu,
 sinón que venía a iguar
 y preparar la to venida,
 porque yeres Tu la lluz del mundu
 el que das el sentíu plenu
 y verdaderu a la vida.

Él dio testimoniu de ti,
 diote a conocer tanto de pallabra
 como cola so vida,
 pa que foren a ti
 p'alcontrar en ti, vida plena.

Señor, ayúdanos nesta Navidá,
 que tamién nós
 como Xuan Bautista,
 podamos dar testimoniu de ti
 nes nuses families,
 ente los nuses amigos,
 pa que seyas Tu
 el qu'actúes en nós
 y asina nos arreyes a ti
 con llazos d'amor y misericordia.

Regálamos Señor la gracia
 de ser preseos tuyos
 pa qu'otros te busquen
 y asina seyas Tu pa nós,
 vida y salvación.

Qu'asina seya.

En folgando un pocoñín, siguiestis p'alantre. Lleváis un tiempu ensin tener duldes sobro'l trayectu, porque yá sabéis en tou momentu per ú tenéis qu'avanzar. En verdá, esti tramu ta enllenu señales que vos van ayudar a ver fácilmente'l camín.

Sicasí, pasastis unos díes nos que, a pesar de que sentíais que la meta taba cerquina, l'esfuerzu de tol viaxe empezábvos a pesar.

Empezastis a duldar sobro si pagaba la pena seguir, y llegastis a pensar en que, quiciabes, se vos pidía demasiao.

Pero xustu nesos momentos de mayor debilidá, esperimentastis l'ayuda qu'un pequeñu recibe de so ma o pá cuando yá nun pue caminar más, cuando paez que va cayer.

De secute, toos tabeis de nueves preparaos pa seguir con rixu y conquistar nuevos retos. El final avérase.



Evanxeliu

Lluques 1, 26-38.

A los seis meses, l'ánxel Gabriel foi unviáu por Dios a una ciudá de Galilea, llamada Nazaré,

a una virxe casada con un home llamáu José, del fonduxe de David; la virxe llamábase María.

L'ánxel, entrando a la so presencia, dixo:

—Allégrate, enllena de gracia, el Señor ta contigo; bendita tu ente les muyeres.

Ella alterióse énte estes palabres, y preguntábase qué saludu yera aquél.

L'ánxel díxo-y:

—Nun tengas mieu, María, porque atopasti gracia énte Dios. Vas concebir nel to vientre y vas dar a lluz un fíu y vas pone-y de nome Xesús. Va ser grande, va llamase Fíu del Altísimu, el Señor Dios dará-y el tronu de David, so padre, va reinar sobro la casa de Xacob pa siempre, y el so reinu nun va tener acabación.

Y María dixo al ánxel:

—¿Cómo va ser eso, pos nun conozo varón?

L'ánxel contestó-y:

-L'Espíritu Santu va venir sobro ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ende tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben estéril, porque pa Dios nun hai nada imposible.

María repostió:

—Equí ta la esclava del Señor, fáigase en mi acordies cola to pallabra.




Señalética

- **Oxetivu:** cavilgar sobro cómo vivimos esti advientu y cómo nos tamos preparando pa la llegada de Dios.
- **Preseos:** cartelos con señales axuntes.
- **Desendolque:**

Nel centru la sala asítiense delles señales de tráficu que representen distintes situaciones que los y les participantes puen tar viviendo na so cotidianidá nesti Advientu.

Trátase de qu'el mozu/la moza vaiga pasando per toles señales y escueya 3 señales que más sienta que lu representen y describa por qué.

Pa terminar, va facese una puesta de mancomún. El/la Responsable va empobinar la esposición hacia lo que se vive nes selmanes d'Advientu y la importancia de lo que ta por llugar, la nacencia del neñu Xesús y l'entamu de la Navidá.



DEXE'L PASU

Nun tuvi una actividá bien activa nesti Advientu. Pasó per delante mi y nun me di muncha cuenta d'ello.




DETECCIÓN OBLIGATORIA

Nesti Advientu esforcíeme y paré a cavilgar sobro la importancia d'esti momentu y la preparación de la Navidá.



PRIORIDÁ NUN SENTÍU

Paré a facer una llista coles coses importantes de la mio vida y el llugar de Xesús en caúna d'elles.



USU OBLIGATORIU DEL CINTU DE SEGURANZA

Nestes selmanes d'Advientu consiguí atopame con Xesús, siguir el so camín y decatéme de que con Él, el mio día a día ye más fácil. Él escuchame, Él acompañaame y ayúdame, Él dame ánimos.



ROTONDA

Nesti Advientu púnxime en camín p'atopar a Xesús, pero los aldor qu'escoyí nun me terminaron de llevar a Él.



OTROS PELIGROS

Nesti Advientu atopéme con situaciones adverses nel camín escontra Xesús, como por casu, l'impulsu del consumismu.



XUBA PERPINDIA

Nestes selmanes d'Advientu atopéme con torgues que me fixeron más difícil l'alcuentru con Xesús, por casu, el nun tener tiempu pa rezar, el nun falar de Xesús colos mios amigos, cola mio familia...



Cantar



El amor que tú me das - Franco Figueroa

<https://www.youtube.com/watch?v=5rZ7orYXtXY>

<https://www.youtube.com/watch?v=YNUXCfIH88A> (vídeo con letra)



¡Ven!, Tu que yes claridá pon seguridad nes nubes dulces.
¡Ven!, Tu que yes paz, pon amistad nes nubes relaciones.
¡Ven!, Tu que yes amor, pon entrega de baldre nos nubes días.
¡Ven!, Tu que yes alegría, pon música nos nubes corazones.
¡Ven!, Tu que yes esperanza, pon fe nes nubes oraciones.
¡Ven!, Tu que yes Luz, alluma les nubes vides.
¡Ven! ¡Ven!, Señor, yá te tamos aguardando.
Amén.

Y equí ta. A la fin, ¡consiguimos llegar a la Lluz! ¡Norabona Pioneros y Pioneres! Pero tratemos d'afondar na aventura que vivimos, nesti camín d'Advientu.

Na nuesa travesía, nes nuses vides, tamién sentimos munches vegaes convites, señales, llamaes pa tomar un aldu o otru. Vamos xorreciendo y vamos tomando decisiones, acompañaos de la familia, de los amigos y amigues, de los collacios y collacies de Rama, de los/les responsables scout, de los/les catequistes...

Pero, ¿sentístisvos dalguna vegada como cuando vivistis el tramu del ermu, aquel que tenía lluces distintes y que vos condució a seguir el vuesu camín a soles? Nun ye estraño sentilo, porque ún diz "yo puedo al mio aire, yo solu coles mios fuerces, nun preciso de naide..." Anque seguro que, tal qu'esperimentastis, esa soledá llévavos a tar aisllaos y murnios... y resulta ser una falsa señal del camín.

Y la vuesa posa nel campamentu, xunta'l ríu. ¿Sentístis dalguna vegada la llamada p adir a un llugar asemeyáu? A la bayura de les coses, a nun valorar lo que tenemos, a sentivos más poderosos y más importantes que los demás, a permanecer pasivu énte los problemes que nos arrodeen, a vivir cómodamente refuxaos/es nel ruiu ensin que nos fadien... ye un aldu que munches vegaes tamién mos podemos sentir tentaos a tomar, pero como pudimos comprobar naquella llacuada, conduz a vides bien baleres.

N'ocasiones, ye bien frecuente tamién pensar en que se nos pide demasiao. Como naquél tramu final del vuesu viaxe, hai ocasiones nes qu'ún sabe que ta avanzando pel bon camín, viendo les señales bien clares, pero nun se siente quien pa seguir dando pasos p'alantre. Sabéi que la nuesa ma del cielu aceptó la mayor xera sintiéndose la más pequeña, asina que siempre nos va curiar nos nuestos momentos más febles.

Como comprobastis al completar tolos retos, en siguiendo les falses llamaes y experimentar esa xirigonza y esa murnia, hubo daqué que vos devolió al camín de verdá, al que conduz realmente a la Lluz. ¿Sabéis qué ye? N'efectu, mirar al cielu, mirar más p'allá. Solo asina fuistis capaces de ver esa Lluz tan rellumante que reina sobre lo demás. Ye Xesús. Cuando sintáis qu'avanzáis equivocadamente, mirái-y pa Él y confiái: Él nun defrauda nin engaña, porque siempre convoca al camín de verdá.

Agora que yá lu afayastis, sois portadores de Xesús, de la so Lluz, asina que tenéis una misión pergrande: **llevalu a toles persones que nun tienen la suerte de conocelu.**



De 18 a 23 años



LA
LLUZ
DE
LA
PAZ
DE
BELÉN



SCOUTS®

MSC X

Afáyate na aventura

Dios a lo llargo de la hestoria buscó homes y muyeres dispuestos a escuchalu y a colaborar col so proyectu. Xente dispuesto a fiase de la so pallabra y a complicase la vida por Él.

A lo llargo d'estes cuatro selmanes d'advientu vamos tener la posibilidá d'atopanos con delles d'estes persones capaces de conectar con Dios.

L'advientu ye tiempu d'espera, tiempu de preparación, tiempu de caltener viva la llaparada de la esperanza nun Dios que s'atreve a vivir con nós, a compartir la nuesa suerte. Oxalá mentes esti tiempu seyamos quien pa tar dispuestos pa preparar la so llegada.

- ➡ Realizar una actividá.
- ➡ Completar una reflexón.
- ➡ Facer una oración.

Entamamos esta aventura nun castiellu. Ye la to vida, la to seguridad. Ye'l llugar nel que tamos a gustu. El to castiellu val pa preparate, pa velar les tos armes, que son tolos tos valores, pero tamién hai que tar dispuestos a salir y alcontrate col mundu y colos hermanos y les hermanes.

Nesta primer selmana pidímoste que pienses nos valores que tienes y que te puen ayudar nel viaxe de la to vida.

Evanxeliu

Mc 13, 33-37



—Mirái, xixilái: porque nun sabéis cuándo ye'l momentu. Ye igual qu'un hombre que coló de viaxe, y dexó la casa y dio-yos a caún de los criaos la xera, encamentando al porteru que velara.

Velái entós, porque nun sabéis cuándo va venir el dueñu de la casa, si al atapecer, o pela medianueche, o al cantar el gallu, o al riscar: nun seya qu'apaeza de sutrucu y vos alcuentre apigaciando.

Lo que vos digo a vós, dígo-yoslo a toos: ¡velái!



Sones

- **Oxetivu:** estrayer barreres o torgues nel día a día que mos quiten de tar solertes a lo qu'asocede na nuesa rodiada y a lo que Dios mos quier tresmitir.
- **Preseos:** nengún.
- **Desendolque:** nun llugar lo más natural que se pueda, dexar un tiempu en silenciu au pongamos atención a tolos soníos que s'oin al rodiu.

Compartir los sonos col grupu y tamién les resonancias d'estes entrugues:

- ¿Qué coses mos torguen de "tar sollertes"?
- ¿Qué coses nun mos dexen "sentir" al nuesu rodiu con claridá?

Rosana - "Sin Miedo"

<https://www.youtube.com/watch?v=itbA8sE18o>



Tas nun ermu, un llugar grebu y aparentemente ensin vida. Pero l'ermu tamién ye un llugar p'atopase consigo mesmu, y tamién con Dios.

El pueblu d'Israel pasó cuarenta años nel ermu enantes d'aportar a la tierra prometío. Xesús pasó cuarenta díes nel ermu enantes d'entamar la so misión. Nós vivimos fai bien pocu tiempu nuesa mesma cuarentena por mor del virus de la COVID-19.

Seique este seya'l momentu de que pares un migayín, pienses cómo va la to vida y, sobremanera, p'áú tienes d'empobinala. Aprovecha la esperiencia d'ermu.

Evanxeliu

Mc 1, 1-8



Entama l'Evanxeliu de Xesucristu, Fíu de Dios.

Ta escrito nel Profeta Isaías: Yo unvio'l mio mensaxeru delante ti pa que te tresne'l camín.

Una voz glaya nel ermu: Preparái el camín al Señor, allanái les sos siendes.

Xuan bautizaba nel ermu: pedricaba que se convirtieren y se bautizaren, pa que se-yos perdonaren los pecaos. Allegábase la xente de Xudea y de Xerusalén, confesaben los sos pecaos y él bautizábalos nel Xordán.

Xuan diba vistíu con pelleyu de camellu, con una correa de cueru en cadril y alimentábase con saltapraos y miel montés. Y clamiaba:

—Tres de mi vien el que pue más que yo, y yo nun amerito agachame pa desamarrar-y les sandalies.

Yo bauticévos con agua, pero él va bautizavos con Espíritu Santu.





Hai periodos na vida de tou y toa creyente que pasa per “ermos espirituales”, y ye que llamamos ermos espirituales a esos periodos de secañu, nos que por dalguna razón dexamos de ser sensibles a lo espiritual, nos que nun dan ganas d’orar, nos que lo espiritual lléganos a paecer hasta aburrío y nos que por dalguna razón nun sentimos la presencia de Dios sobro les nuses vides como n’otros momentos sintiéremos.

Un “ermu espiritual” ye esi periodu nel que sentimos que les nuses oraciones son seques, nos qu’asonsañar una allabancia paez solo una simple repetición de pallabres, nos que mos centramos más no secular que no espiritual, nos qu’hasta perdimos l’oxetivu qu’en dalgún momentu tracemos.

Ye duro tar nesi periodu d’ermu espiritual, naide piensa n’aportar ellí en realidá, pero toos y toes en dalgún momentu llegamos a esi puntu, non porque lo queramos, sinón que munches vegaes ye consecuencia del nuesu baxu nivel de comunión con Dios o ye productu de dexar que los problemes que nos arro dien ganen la partida a la nuesa fe.

Un ermu espiritual ye ún d’esos periodos que naide quier vivir, ye ún d’esos momentos que naide mos dixo que pasaríamos, ye un tiempu nel que deseyamos satisfacenos de Dios, nel que tenemos una sede pergrande d’Él pero por dalguna razón nun podemos quitala. Esos ermos son los que destrúin la vida espiritual de les persones si nun lo llogren superar, son esos ermos los que faen d’un siervu/a, un esclavu/a de la rutina y adulces allóñanos de Dios. Quiciabes güei t’atopes nun ermu espiritual, u’l to corazón se endureció, u yá nun yes tan sensible como enantes o u yá nun ves les coses de la mesma manera qu’enantes les vées.

Esti ye’l día nel que tienes qu’entamar a salir d’esi ermu, ye güei’l momentu nel que tienes que proponete nel to corazón salir alantre, nun ye posible qu’esi ermu te gane, nun ye posible que tolo qu’avanzasti quede fundío nesi ermu.

Güei tienes que salir d’esi ermu espiritual dafechu, tienes qu’entamar a orar con sinceridá, tienes qu’alimentate de la Pallabra de Dios con un corazón humilde, nun hai fórmula máxica pa salir d’ellí, solo la humildá y cencellez de corazón pue facer que vuelvas ser el/la mesmu/a creyente qu’un día fuisti.

Cavilga perbién (Llamentaciones 3:40) qué foi lo qu’adulces te foi llevando a esi ermu y al detectalo entama per camudar cada cosa que nel so momentu fixisti mal. Si dexasti d’orar, ye hora d’entamar pasu ente pasu a facelo de nueves, ye mester que forxes un vezu d’oración, si dexasti de lleer la Biblia ye hora d’entamar de nueves a lleela diariamente, si dexasti de congregarte ye hora de poner los tos güeyos en Dios y non nel home/muyer y empezar a congregarte, si dexasti de facer el bien porque cansasti de ser bonu, ye hora de que con humildá entames de nueves a facer el bien, non pa prestar al güeyu humanu, sinón pa prestar a Dios.

Dios quier atopase contigo, la entruga ye: ¿Quies tu atopate con Dios? Si bramente tienes sede de Dios tienes qu’entamar a buscar ensin poner nenguna escusa, pero sobremanera, qu’a la de buscalo siempre tengas un corazón congoxosu y humildáu. (Salmos 51:17).





Melendi - "Como el agua y el aceite"



<https://www.youtube.com/watch?v=bBTJLf2uE3Y>

Ermos

- **Oxetivu:** cavilgar sobro la situación d'ermu en que vivimos en dellos momentos les persones.
- **Preseos:** semeyes d'ermos con dellos datos.
- **Desendolque:** preséntense semeyes de distintos ermos con dellos datos significativos. Qu'escueyan dalgún que-yos llame l'atención. Depués propónse describir cuales son les dificultaes de la vida ellí pa les persones. Buscamos dificultaes dende lo económico y de recursos, pero tamién lo afeutivo y relacional ente les persones.



Siguimos cavilgando cola ayuda d'estes entrugues:

- ¿Vivimos dalguna vegada tamién nun ermu?
- ¿Qué situaciones nos faen sentir soledá o abandonu?
- ¿Qué dificultaes tenemos nel día a día?
- ¿En que mos sofitamos pa superales?
- ¿Qué nos motiva pa seguir?

Aportemos a un ríu, un llugar de vida y de reñacer.
 Llavase na tradición bíblica non solo yera un xestu d'hixene, sinón que yera tamién un elementu de purificación espiritual.
 Poro nesti puntu pidímoste qu'entrigues sobro los tos deseos de cambéu, de renacer, de lliberate de les suciedaes que puedan existir na to vida.
 Esti camín p'atopase cola lluz rique esa purificación personal.
 Pero amás el ríu fálanos del nuesu bautismu, d'esi actu que recibimos un día, seique demasio llonxanu yá, pero que tien que ser actualizáu nel tiempu.
 Seique te bautizasti na infancia, pero esi bautismu tien de ser un compromisu vivíu nel día a día.
 Somórguate na to vida y entrúgate cómo tas viviendo'l to compromisu cristianu.



Evanxeliu

Xuan (1,6-8.19-28)

Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.
 Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a que-y entrugaren: «¿Tu quién yes?»
 Él confesó ensin pensalo: «Yo nun soi'l Mesías.»
 Preguntáron-y: «¿Entós, qué? ¿Yes tu Elíes?»
 Él dixo: «Nun lo soi.»
 «¿Yes tu'l Profeta?»
 Retrucó: «Non.»
 Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»
 Él contestó: «Yo soi la voz que glaya nel ermu: "Allaná el camín del Señor", como dixo'l profeta Isaías.»
 Ente los unviaos había fariseos y preguntáron-y: «Entós, ¿por qué bautices, si tu nun yes el Mesías, nin Elíes, nin el Profeta?»
 Xuan respondió-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dighu de desamarrar la correa de la sandalia.»
 Esto pasaba en Betania, na otra vera del Xordán, u taba Xuan bautizando.



Arrepenimientu

- **Oxetivu:** esteriorizar delles actitúes personales de les que mos arrepenimos y que mos gustaría desanicar.
- **Preseos:** fuyes de papel, bolígrafos, barcal y agua.
- **Desendolque:** déxase dellos minutos en silenciu. Dexamos distancia ente les persones pa mayor tranquilidá. Propónse cavilgar y escribir en dellos cachos de papel coses de les que caún s'arrepiente.

Depués llávense ente ellos delles partes del cuerpu y dexen somorguiaos los papeles de lo que quieren desanicar.
 Dempués pue comentase si a daquién-y prúi, cómo se sintió o qué escribiera nos papeles.

Liberando el Corazón - "Me pongo en rumbo"

[https:// www.youtube.com/watch?v=V54Yf6bqxYc](https://www.youtube.com/watch?v=V54Yf6bqxYc)





Les señales qu'atopamos nel nuesu camín ayúdenos a atopar la meta. ¿Podríemos facer el Camín a Santiago o cualquier ruta ensin les señales? Pos sí podríamos facelo, pero les probabilidaes de perdesed sedríen muncho mayores.

De xuru que na to vida hebo muncha xente y situaciones que te valieron de señal pa tomar determinaes decisiones. Dacuando fadríemos casu y otres non. Lo importante ye reconocer qu'esa xente tuvo ende y que nos tentó d'ayudar.

Les señales fálenos de tomar decisiones, d'escoyer, no fondero, d'exercer la llibertá. Tas a un pasu de llegar a atopate cola lluz, ¿tas dispuestu a dar el pasu? Imaxino que sabes qu'a la fin del camín ta Xesús. Él siempre t'espera, ta a la puerta cola so llámpara, ta esperándote a ti. Gracias por facer esti camín.



Evanxeliu Lluques 1, 26-38.

A los seis meses, l'ánxel Gabriel foi unviáu por Dios a una ciudá de Galilea, llamada Nazaré,
a una virxe casada con un home llamáu José, del fondu de David;
la virxe llamábase María.

L'ánxel, entrando a la so presencia, dixo:

—Allégrate, enllena de gracia, el Señor ta contigo; bendita tu ente les muyeres.
Ella alterióse énte estes palabres, y preguntábase qué saludu yera aquél.

L'ánxel díxo-y:

—Nun tengas mieu, María, porque atopasti gracia énte Dios. Vas concebir nel to vientre y vas dar a lluz un fíu y vas poney de nome Xesús. Va ser grande, va llamase Fíu del Altísimu, el Señor Dios dará-y el tronu de David, so padre, va reinar sobro la casa de Xacob pa siempre, y el so reinu nun va tener acabación.

Y María dixo al ánxel:

—¿Cómo va ser eso, pos nun conozo varón?

L'ánxel contestó-y:

—L'Espíritu Santu va venir sobro ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ende tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben estéril, porque pa Dios nun hai nada imposible.

María repostió:

—Equí ta la esclava del Señor, fáigase en mi acordies cola to pallabra.



Lluz nel mundu

Fabricar ente toos delles formes de facer lluz:

- Llinterna con veles
- Bombilla + pila de petaca
- ...



Propónse reflexonar sobre les distintes formas que tenemos les persones de facer lluz nel mundu.

- ¿Prestaría-me ser lluz nel mundu? ¿Cómo lo faigo?
- ¿Esisten distintes menes de lluz nel mundu?

Jarabe de Palo - "Eso que tu me das"



<https://www.youtube.com/watch?v=hE6CsyWv8Zs>



Hola Xesús,
amigu, hermanu,
y Dios míu.
Quiero dexate vivir nel mio corazón,
pa que puedas facer de mi
la meyor de les persones que yo pueda ser.
Una vegada dixisti que los tos amigos son la lluz del mundu.
Préstame eso de ser lluz,
d'allumar a tolos que m'arrodien
cola lluz de la mio solidariedá,
pa facer que los que tán murnios vivan nuna fiesta,
pa facer que los que viven la escuridá del refugu,
esfruten la lluz y calor de la compañía,
pa facer que los que lo ven too prieto
lo vean too de color esperanza.
Quiero dicite sí, Xesús.
Quiero que vivas en mi,
porque nun me gusta la escuridá,
la escuridá na que me zarra'l mio egoísmu,
la escuridá na que m'atrapen los mios enfados,



la escuridá na que me funden los mios petites,
la escuridá de tantes cosas males d'esti mundu.

Quiero dicite Sí, Xesús,
pa que m'enlles de les tos lluces de colores,
colores d'allegría, d'esperanza, de vida.

Quiero que m'ayudes a sentir
la calor de la to lluz d'amistá dientro mi,
porque asina voi poder ser pa los demás
la to lluz y calor d'amistá
cola mio forma d'obrar y actuar.
Asina voi poder ser lluz d'esperanza
pa los que m'arro dien caldía.

Mayores de 23 años



SCOUTS®



MSC


Sabemos que nun foi un año fácil. Tuvimos más de media ronda solar en casa, ensin poder ver a "los nuegos/es neños/es". Pero les fuerces non escosaron, inventemos milenta actividaes pa seguir en contactu con ellos y elles. Pa seguir creando'l Reinu de Dios facendo meyores persones a toos/es esos/es pequeños/es valientes.

Foron díes oscuros, d'incertidume, pero la esperanza d'un nuevu resurdir siempre taba. El "too va salir bien" fíxose'l nuesu lema en momentos de flaqueza.

Fuimos imaxe del escultismu dende l'otru llau de la pantalla. Diemos exemplu de fortaleza a los que más precisaben de nós y tuvimos milenta conceyos online pa saber qué pasu dar. Caminemos enforma, pero nun caminemos en solitariu. Xesús tuvo siempre al nuesu llau, dándonos esa fuerza que precisábemos pa seguir p'alantre.

Agora, cuando Xesús ta a piques de ñacer, ye cuando más fuertes mos quier, pa glayar al altu la lleva qu'esi neñu que ñació en Belén ye'l Fíu de Dios, que se fixo home por nós.

Proponémosvos unos materiales pa esos momentos d'enantes d'aconceyar colos neños, pa qu'a nós tamién nos vaiga anubriendo la lluz per tol nuesu ser, porque aunque fuera un año d'escuridá, Él relluma na escuridá.





Nestos díes, preparámonos pa la llegada de Xesús. Él ye la nuesa fortaleza. U mos abellugamos a la gueta consuelu y templanza. Cuando sentimos que les parés del nuesu castiellu entamen a esbarrumbase y que too pierde'l so sentíu, Dios danos les ferramientes necesaries pa fortalecenos.

Poro, vemos de lloñe esa lluz que mos llama, que nos emburria a dir escontra d'ela. Pero nun vamos en solitariu pel camín. Tol grupu mos acompaña. Nunca los dexamos solos, siempre puen cuntar con nós.

Empezamos el camín escontra la lluz, pidiendo a Dios que mos dea la sabencia pa ver les sos señales con claridá y la paciencia necesaria pa nun arrenunciar nel desaliendu.

Evanxeliu

Mc 13, 33-37




Naquel tiempu dixo Xesús a los sos discípulos:

—Mirái, xixilái: porque nun sabéis cuándo ye'l momentu.

Ye igual qu'un hombre que coló de viaxe, y dexó la casa y dio-yos a caún de los criaos la xera, encamentando al porteru que velara.

Velái entós, porque nun sabéis cuándo va venir el dueñu de la casa, si al atapecer, o pela medianueche, o al cantar el gallu, o al riscar: nun seya qu'apaeza de sutrucu y vos alcuentre apigaciando.

Lo que vos digo a vós, dígo-yoslo a toos: ¡velái!



Señor, ponémonos na to presencia güei,
xusto enantes d'entamar un nuevu alcuentro con ellos.

Ellos son la causa de que teamos equí
y queremos facer lo meyor p'acompañalos a convertise en persones sanes y
responsables colo qu'asocede al so rodiu.

Señor, pidímoste que mos deas lo necesario
pa ser dignos acompañantes del so camín, qu'examás nun dexes d'acompañanos
a nós, porque ensin Ti nun somos nada.

Señor, vamos a la gueta'l to Fíu,
al que queremos emponderar y engrandecer.
Ayúdanos a alcontrar la so lluz. Amén.



Caminar nun ye un rispiu fácil, hasta'l ser humanu nun ñaz sabiendo facelo. Tenemos de depender adules a caminar. Entamamos seliquino, con pasos lentos y caidizos, pero que col tiempu y el rixu se fixeron firmes y rápidos.

Lo mesmo mos pasa coles dificultaes y los momentos d'incertidume. De primeres vemos que nun somos quien pa solucionarlos, too ta escuro ensin solución.

Pero aporta un día nel que la lluz mos anubre, nel que la fe mos da l'emburrión pa seguir p'alantre. Nel que la lluz de Cristu ye'l nuesu faru más preciáu y al que decidimos seguir.

El camín ye duru, pero en compañía y ayudándonos ente toos y toes, vamos poder xebrar les piedras qu'atopemos y seguir caminando escontra Xesús.

Evanxeliu

Mc 1, 1-8



Entama l'Evanxeliu de Xesucristu, Fíu de Dios.

Ta escrito nel Profeta Isaíes: Yo unvio'l mio mensaxeru delantre ti pa que te tresne'l camín.

Una voz glaya nel ermu: Preparái el camín al Señor, allanái les sos siendes.

Xuan bautizaba nel ermu: pedricaba que se convirtieren y se bautizaren, pa que se-yos perdonaren los peccos. Allegábase la xente de Xudea y de Xerusalén, confesaben los sos peccos y él bautizábalos nel Xordán.

Xuan diba vistíu con pelleyu de camellu, con una correa de cueru en cadril y alimentábase con saltapraos y miel montés. Y clamiaba:

—Tres de mi vien el que pue más que yo, y yo nun amerito agachame pa desamarra-y les sandalies.

Yo bauticévos con agua, pero él va bautizavos con Espíritu Santu.



Los profetes calteníen prendida la esperanza d'Israel.
 Nós pidímoste nun perder esa esperanza,
 caltener la llama prendida
 y espardela per tol mundu al traviés del escultismu católicu.
 Que tol mundu s'entere de que Xesús
 va ñacer bien llueu y que lu tamos esperando.
 Que vamos ser portadores y espardedores de la so Bona Noticia.
 Pidímostelo por Dios el Nuesu Señor. Amén.

Munches vegaes hai que facer una posa nel camín. Creemos que por seguir caminando yá tamos diendo escontra'l nuesu destín, pero non siempre ye asina. El camín va emporcándonos, va trescalando la nuesa piel d'una película que mos va escureciendo l'alma. Cuando mos zarramos en nós mesmos siguimos atropando suciedá.

Poru hai que facer poses nel camín de xemes en cuando. Tenemos de dir a esi ríu que mos purifica. Sacar de dentro toa aquella suciedá que mos amarga la existencia. Esi ríu que mos devuelve reñacíos a una nueva esperanza de poder facer lo meyor de nós. Tenemos de llimpianos pa poder ver la grandor de la obra de Dios que ye la naturaleza, pa poder apreciala y enseñar a los demás a apreciala. Siempre cola güeyada puesta nesi alcuentru con Xesús que ta a piques d'asoceder cola so nacencia.

Evanxeliu

Xuan (1,6-8.19-28)



Surdió un home unviáu por Dios, que se llamaba Xuan: esti venía como testigu, pa dar testimoniu de la lluz, porque por él toos vinieren a la fe. Nun yera él la lluz, sinón testigu de la lluz.

Y ésti foi'l testimoniu de Xuan, cuando los xudíos unviaron dende Xerusalén sacerdotes y levites a Xuan, a que-y entrugaren: «¿Tu quién yes?»

Él confesó ensin pensalo: «Yo nun soi'l Mesías.»

Preguntáron-y: «¿Entós, qué? ¿Yes tu Elíes?»

Él dixo: «Nun lo soi.»

«¿Yes tu'l Profeta?»

Retrucó: «Non.»


Y dixéron-y: «¿Quién yes? Pa que podamos dar una respuesta a los que nos unviaron, ¿qué dices de ti mesmu?»

Él contestó: «Yo soi la voz que glaya nel ermu: "Allanái el camín del Señor", como dixo'l profeta Isaíes.»

Ente los unviaos había fariseos y preguntáron-y: «Entós, ¿por qué bautices, si tu nun yes el Mesías, nin Elíes, nin el Profeta?»

Xuan respondiós-yos: «Yo bautizo con agua; metanes de vós hai ún que nun conocéis, el que vien tres de mi, y al que nun soi dignu de desamarrar la correa de la sandalia.»

Esto pasaba en Betania, na otra vera del Xordán, u taba Xuan bautizando.



Señor, na escuriá prendióse una lluz, nel ermu clamió una voz.

Dase anuncia de la bona noticia: ¡El Señor va llegar!

Preparái los sos caminos, porque yá ta cerca.

Adornái l'alma como una moza s'engalana'l día'l so casoriu.

Yá llega'l mensaxeru.

Xuan el Bautista nun ye la lluz, sinón el que mos da anuncia de la lluz.

Caún de nós quier ser antorcha de to pa que rellumes, llama pa que calezas. ¡Ven

Señor a salvarnos, envuélvinos na to lluz, caleznos nel to amor!

Pidímostelo por Dios el Nuesu Señor. Amén.

Nun somos infalibles. Si fuéremos, la brúxula nun s'inventaría. Nun esistiríen les señales. Somos humanos, y como talos, munches vegaes perdemos el norte, perdemos la perspectiva y l'aldu que tábemos llevando. Nesos momentos, tenemos de buscar a la Lluz con mayúscules, buscar señales que mos indiquen p'aú dir.

Pero anque tamos arrodiaos/es de señales, munches vegaes nun somos quien pa veles y otres vegaes, les señales nun son tan clares como quedríemos que fueren, sinón que puen ser tresmitíes por persones que Dios punxo nel nuesu camín.

Tenemos de siguir el camín, pero non caminar solos. Tener la mente abierta a los cambeos y a depender siempres. Tenemos que quitamos la mázcara que mos torga de ver y abrir los güeyos al mundu. Ver más p'allá.

Evanxeliu

Lluques 1, 26-38.



A los seis meses, l'ánxel Gabriel foi unviáu por Dios a una ciudá de Galilea, llamada Nazaré,

a una virxe casada con un home llamáu José, del fonduxe de David; la virxe llamábase María.

L'ánxel, entrando a la so presencia, dixo:

—Allégrate, enllena de gracia, el Señor ta contigo; bendita tu ente les muyeres.

Ella alterióse énte estes palabres, y preguntábase qué saludu yera aquél.

L'ánxel díxo-y:

—Nun tengas mieu, María, porque atopasti gracia énte Dios. Vas concebir nel to vientre y vas dar a lluz un fíu y vas pone-y de nome Xesús. Va ser grande, va llamase Fíu del Altísimu, el Señor Dios dará-y el tronu de David, so padre, va reinar sobro la casa de Xacob pa siempres, y el so reinu nun va tener acabación.

Y María dixo al ánxel:

—¿Cómo va ser eso, pos nun conozo varón?

L'ánxel contestó-y:

—L'Espíritu Santu va venir sobro ti, y la fuerza del Altísimu va anubrite cola so solombra; por eso'l santu que va ñacer va llamase Fíu de Dios.

Ende tienes a la to pariente Isabel que, pesie a la so vieyera, concibió un fíu, y yá ta de seis meses la que llamaben estéril, porque pa Dios nun hai nada imposible.

María repostió:

—Equí ta la esclava del Señor, fáigase en mi acordies cola to pallabra.



Ma de Xesús y Ma nuesa.

Nun va haber naide qu'esperara con más amor y más alegría a un fíu que tu.

Naide nun tuvo tanta esperanza na llegada del Salvador.

Ma, enséñanos a preparanos pa recibir al to Fíu como tu lu esperasti.

Queremos ser cuidadosos colos que mos arrodien como tu fosti.

Ma, queremos ser espeyu de fe como tu fosti.

Pidímostelo por Dios, el nuesu Señor. Amén



Y ellí taba. A la fin conseguimos llegar a la Lluz. Esa fuerza que mos emburriaba pa seguir el camín yera Xesús, el nuesu gran amigu. Él ye la lluz que víamos dende lo más fondo del nuesu castiellu, acompangónos nel ermu, púnxonos la naturaleza pa que mos llimpiáremos y dionos señales pa que lu atopáremos y lu siguiéremos. Agora esa Lluz yá lluz dentro ti, porque la Lluz rellumó na escuridá.

Por cumplir tolos retos ganasti ser portador/a d'esa lluz y tienes una misión pergrande: llevar esa Lluz a toles persones que nun tienen la suerte de conocer a Xesús y compartila.

